

**WARHAFFTIGE
NUWE ZITTUNG
DES JUNGST
VERGANGNEN
TUTSCHEN KRIEGS**

Ernst Götzing



eur. 694 $\frac{d}{-}$ 143



WARHÄFFTIGE

NUWE ZITTUNG

DES JUNGST VERGANGNEN

TUTSCHEN KRIEGS

durch

ERNST GÖTZINGER

doctor und schülmeister zû Sangallen.

Ze Sangallen in der loblichen statt
Scheitlin und Zollikofer ditz büchlin verlegt hat,
im jar do nach des heylands geburt
achtzechenhundert und lxxi gezellet wurd.

194² (143) Sammlung

Bayerische
Staatsbibliothek
München

WARHAFFTIGE
NUWE ZITTUNG
DES JUNGST VERGANGNEN
TUTSCHEN KRIEGS


durch

ERNST GÖTZINGER
doctor und schülmeister zû Sangallen.



nun da habend ir üweren kunig, den ir
erwellet und gebätten habend.

1 Sam. 12, 13.



Wer sleht den lewen?
 wer sleht den risen?
 wer überwindet jenen und disen?
 das tñot der der sich selber twinget.

Walther v. d. Vogelweide.



Minen fründlichen und geliebten
 sönlein, ouch minem döchterlin,
 embiet ich Ernst Götzingen gnad,
 frid und reine erkantnus des
 waren gloubens, ouch christen-
 liche zucht und gehorsame.

Uwer liebhabender vater hat uß inbrunstiger liebe zû
 sinem vaterland von zarter kindheit an die geschich-
 ten so darin geschechen durchmusteret, und hat er,
 wie ir erfaren mugend, wan ir zû üwern jaren ku-
 men werdet, ouch und insunderheit die geschichten
 siner nuwen heimat — wan unser geschlecht alsam
 die wandervögelin tûnd nit alweg an dem glichen
 gesidele geseßten — sißig durchsüchet und darzû und
 sinen türen fründen zû nutz und ergetzung das alt
 bûch Sabbata genant ernuweret, so der erwidig
 Johannes Keßler zû den großen ziten der gloubens-
 ernüwerung sinen sönen und siner vaterstatt hinder

sich gelaßten. Und wil denn hüt, ir mini allerliebste kinder, ouch ziten sind, an denen gar sunderbare taten geschehend, so wil ich minem Keßler nachfolgende ouch üch ein chronik uffschriben. Dan daß der mensch sige zü siner zit wie höw, wie Keßler schribet, und blüet wie ein blüm uff dem feld; wann der wind darüber gat, so ist er nimer mer da, und ir statt kennet sy nit mer, das ist hüt als war sam vor drühundert jaren, und mugend ir darumb wol etwas hören von den türen und wunderbarlichen hystorien, geschichten und löuffen diser unser gegenwurtigen zit, wol wirdig und notwendig unsern kindskinder ze entdecken.



Im monat julii des jungst vergangnen jars, was ein warmer fruchtbarer summer und hettend unser koufflüt und sticker und weber ein gar ußgibig gewerb, do was die zit des kinderfests gekumen, und fröuwend sich gemeinlich die kinder daruff als es ein heilig wihnacht wär, und het üwer mäter ouch schon ein nuw wiß röcklin für das döchterlin gerichtet mit einer blowen maschen, und die herren vom rat probiertend den win und warend me im spitalkeller dann in der ratstuben, und was die hülzin dantzbüni ouch schon gebuwen, und was alles so fridsam sam der gütig Gott selber uff erden regiert, und die jungen kriegsknecht, so uff dem brüel ir kunst übtend und flanken und rotten formirtend, warend wenig kriegscher dan die schaflin so das gras abbißend das des kriegsvolks fuß nit vertreten, und warend ouch unser nachburen, die Osterricher und

Swaben und Franzosen und Italier nit uffgelegt wan zû loblichem handel und wandel, und allein die hõppter der kristenheit, uff dem concilio zû Rom versamnet, strittend hart mit vast vil worten und villicht mit fûnsten umb des papsts sin ubernaturlich herrlichkeit, — do gieng ich ein mal in die schûl und welt ich do minen schûlern eben von den lenderen umb unser Eidgenoßtenland herumb berichten, wie da ein tûtsch land wer, daß gehort zum größesten teil dem kunig in Prûßtenland, und sigend danebend noch die Swaben, und derselben nachburen in occidente sigend die Franzosen und heiße ir kaiser und oberster herr Napoleon, und witer in occidente regione sige ein land, Hispania genannt, darin hettend die lût vor kurtzen tagen ire kunigin, ein rechte valandinne, uß dem land gjagt, und sûchtend sy einen nuwen kunig und fundend keinen, und erhielte villicht ietz ein tûtscher prinz die hyspanisch kron, der sige in der magschaft des Prûßtenkunigs. Do bekumt mir min swager und sprichet uff offner gassen zû mir: hörstu, daß krieg ist? Do meint ich, er tribe itel schimpf mit mir und luff in die schûl zû den bûben und warend die aber nuntz nutz und stupftend einand und warend wie die hennen denen die hußfrow ein bekkelin korn vorgeworffen. Und do ich fraget: waß hand ir? do rûfftend al mit ein: krieg, schûlmeister, krieg! Do wars so, und ist kum gloublich, wie der krieg so bald uß dem fride erwachsen kunt.

Item die sach was also geschechen. Der kunig in Prûßtenland, ein gar alter frummer und notfester herre was von sinen libs beschaffenheit wegen in ein heilsam gsundbrunnen gangen, heiße Emps, do welt er sin glid sterken, wan sin Prûßisch regiment im gar sunderbar wol gefiel; do was in demselben ort ein klein unverschampt mænlin, uß Italia burtig, hat einen vil lieplichern namen dan im geburt, wann er Benedetti hieß, das spricht in tûtscher zungen der wolredend, und het er ein botschaft vom kaiser der

Franzosen, daß der Wilhelm sinem vetter verbieten solt die hyspanisch kron anzenemen. Do sagt aber der Prußenkunig, daß in das nuntz angieng, die Hy-spanier möchten tûn waß sy weltend. Do ergrimt der klein großhans und hielt den kunig uff offner straßen uff und tet ungeberdig, sam im nit bekant wen er vor sich hat, und gieng do der kunig in sin loßament und ließ dem graven durch sin truchseß sagen, er solt in rûwen lan. Do ward ein krieg daruß, wan die Franzosen meinten, die ganz welt müßt tûn was sy weltend, und die Prußen ouch, und hettend sy schon vor langer zit vil kriegsvolk gworben mit roten hosen und ouch uß dem land Africa me denn tusend swarz und brun lût zû inen genummen, die warend heiden und ir got hieß Mohammed, und hattend unmaßen vil isin und mössin stuck goßßen und uff räder geladen, und hattend sy ganz absunderlich handbuchsen, die hettend hinten ein trücklin, darin leit man das bulvel und blei, und wenn man danne ein truck tet, gieng der schutz vornen los. Item so hatten die Franzosen ein buchs erfunden, die man sam mir got und potz wunden wol ein tüfelstuck namsen mocht, man nant sy aber nit so; die hattend umb ein ring herumb ein ganz zal zezamengebundener stucklöuff alsam ein bundel orgelpfffen und hinten ein trülly, und wen man trüllyt, so flugend die kugelin heruß sam ein hagelwetter, und sollend ir wissen, daß des kaisers von Frankrich kliner unerwachsner bûb das erst tüfelsstuck abtrüllyt und dorfft man in darumb wol ein tüfelsbûb namsen.



nd do die Tutschen hortend, daß die Franzosen welten ir länd mit krieg überziechen, siche, so stündend sy uff als ein volk und süchtend harnasch und buchsen und nomend sy herab von der wand, und was der zug ires süßvolks und rüter und stuck so groß und villicht größer als zü den ziten des kunigs

Xerxes, und do die fursten und großen herren fragtend, wer ir oberster sin wurd, sprach der Prußenkunig: Gott wird unser obrister sin, under den welten wir uns begeben und vestenklich vertrauwen; des locotenent wil ich sin, eigner person mitziechen, by üch bliben, min lib und güt zü üch setzen und by üch laßsen. Des sich al hochlich erfrowt und on einig widerred wol züfriden gesin. Es het aber der kunig zwen man by im, die so tapfer und wis warend wie David und Salomon, und hieß der erst Bismarkius, uß der altmark burtig, ein graf in Prußensland, der was der klügist under allem volk, und müßtend all tün was er begert, und het er schon vor etlich jaren ein krieg mit Osterliche angehept und gwunnen, der was des kunigs und richs canzelsaere. Item so hieß der ander Moltke, burtig uß Mikkilenburg, des kunigs sin recht hand im krieg, der wußt alles voruß was geschechen müßt, und welt ich niemat raten mit disem allerfurfurttlichsten kriegsman ein strit anzefachen. Do warend aber noch ander feldobristen, und zware so hieß einer Fritze, der was des kunigs sin eigner sun, dem vertrauwend die soldaten ouch als einem vater und fründ, und streit er so tapfer und ritterlich, daß

in sin vater uff der walstatt zum feldmarschalk er-
kos, und hieß ein sin vetter Fridericus Karolus, der
ward ouch feldmarschalk, und warend do noch me
sunderlich und ußbundig tapfer lüt, der Werder und
der Steinmetz und der Mantüffel und der Blümental.

Nu wie der kayser der Franzosen durch sundere
botschaft dem kunig in Prußenland den krieg ange-
sagt, do versamnet der kunig die boten sines lands
in sin kunigklich statt und schloß und redt also zû inen:
ir frommen biderben mannen und vasallen, üwer
nachburen genesit Rins hand uns twungen, in har-
nasch und kriegsrüstung gegen sy zû ziechen, do doch
der fride für uns und sy beßter wär; so lond uns
einmütig all fur ein man kriegem, seind dapffer, ret-
tend üch und die üwern; bewarend unser land, er
und fryheit, daß unsere altfordern ouch getan; Gott
ist unser sterke; so er mit uns ist, so sind wir aller
welt, ich geschwig denen, stark genüg.

Do schruwend all: lond uns fur unser fryheit und
er sterben, und zugend zû iren fänlin und hauptpan-
ner, und sagt man, daß es me denn sibenhundert-
tused man gewesen sigen mit wagen, rossen, ar-
zaten und dienern fur die verwundeten und siechen,
ouch pfaffen, münch und nunden, und sollend darzû
kline bâben sich angehenkt haben, die hat man aber
wider anheim geschickt. Die frowen aber und die
juncfrouwen samneten fur die armen wiber und
kindlin, fur witewen und weisen ir kleinat und ge-
speng und kamend in die siechenhüser und spitäl
und hulfend wes sy kuntend.



un daß ich wider zû unserm land
kere, so müend ir wissen, daß das
Eidgnossenland in kriegslouffen
irer nachburen nit mitgat, sunder
still sitzt; wil aber nit unmöglich,
daß ein irer nachburen einen nä-
chern weg durch unser land fin-
den möcht dan durch der figen-
den bezirk, so berüfften landamman und beid rät lob-
licher Eidgnossenschaft nit wenig der unsern zû den
waffen, ze schirm und schutz der marchen, und ward
deren feldobristen HANS HERZOG uß dem Aargow,
ein gar frummer degen und biderber Eidgnoß, und
mugend ir, mini liebe kinder, noch wol des soldats
gedenken — er was uß dem Hemberg, der dozamal am
17 tag juli by uns sin wonung uffschlûg, und wie er
nit luzzel forcht het vor dem krieg und sin wiblin nit
kunt vergeßsen und den alten vater uff sinem berg-
dorff, und wie ich in trost und uffricht, und ir im sin
feldfläschen mit gûtem win fultet. Zû denselben tagen
aber, do unser fänlin abzog, do luffend die richen lût,
tûtsch, engelländisch und franzosisch, so in unsern
bergen ein uffenthalt hettend gemacht und gamstier
gjagt und ander kurzwil triben, die luffend heim sam
sy gstolen hettend, und sachend unser wirt trurig
drin; doch komend ander ins land, sunderlich ersame
frowen und juncfrowen, die fluchend vor den Fran-
zosen, wan man sagt, daß die Franzosen die wiber
nit ungern hettend. Zû glicher zit löst ein notstand
den andern ab; die münz fieng an felen und ob unser
koufflüt schon vil war und papier hettend, so kunten
sy doch nit zalen, diewil man dozamal mit luterem
gold zalen solt; iedoch hat unser HERRE GOTT ouch
darin gehulffen. Und was ein ander notstand, daß die

nachburen genesit des sees uns den proviant abgestriekt hattend; sy hattend aber allein den kopf verloren und erlobtend den veilen kouff wider, do sy iren kopf wider fundend.



iewol man by uns gloubt, der krieg werd im monat julli sin anfang haben, so gieng es doch noch zwo wuchen, unz die Tütschen und Frantzen zum ersten scharmutztend, und daß ich üch ouch die obristen houptlüt der Frantzen berichte, so hießend sy Leboef, uff tütsch ein stier, ein ußbundiger großhans, der sagt, do man in fraget, ob er grustet sige, das kriegsvolk sige grustet uff den letsten hosenknopf; und hieß der zweit Bazaine, ein unerschrockener degen, so etwan das land Mexico eroberet und wider uffgeben hat; der tritt was Palikao, ein eingeborner fründ des kayzers, der het vor etlichen jaren ein herzug in Sinesiam getan und den palast des kayzers verbrunnen und ußgeplundert, wann er unmaßen vil geldes benötet was sin schulden zû zalen, und warend do noch ander marschälk by den Franzosen, Canrobert und Mac Mahon. Es spricht aber ein alt chronik Sebastiani Franci Wördensis, die Galli, Frantzi oder Frantzosen seind von art ein parteiisch uffwegig volk; wer ein wenig verständiger, gelerter oder richer ist dann der ander, wolt gern herrschen und begert ungeheiß den andern vorzûgon, daß alle ding nach sinem willen geschechen, zancken ouch allermeist mit denen die ouch etwas sein wollen. Sie kriegen mit kürrisser, lantz knecht, büchsen, fast uff tütsch munier, mit mer kûenheit dan gschicklichkeit; zû krieg sind sy allzit gerüst.'



Am 4. tag mensis augusti do die Tütschen on not ein infall der Frantzosen geforcht, ruckt ir kriegsvolk über die grenzmark ins fremde land, und sturmtend die knecht mit unubertreffenlichem müt und on achtung ires lebens die schanzen by dem clauster Wißßenburc, das was dasselb monasterium, darin vor tusend jaren der münch Otfrid sin lied getichtet, und was damit der weg geoffnet witer ins land hinin, also daß zwen tag darnach, was ein sambestag, by Wörth die erst groß schlacht geslagen ward. Umb die 4 stund vormittag genannten tags fiel des vorlouff uß dem wald und trungen mit irer rustung mit stechen, schlachen und schießen so hart, daß die Frantzosen zürugg wichen müßkend. Und ist zû wissen, daß in diser schlacht furnemlich vil swarz und brun lüt uß Africa warend, die fieland herin in die tütschen mit einem wilden grusamen und erschrockenlichen kry oder feldgshrey, das die berg und wald erhalletend; die figend aber so vornen in der ordnung stündend, staltend sich ritterlichen zû der gegenwer und ließend ouch einen lerman hinder sich gon, trungend gwaltig zû, daß die Frantzen dickmal hinder sich wichen müßkend. Also wurdend sy zerstrowt, vil verwundt, vil wurdend unterwegs gefangen und bliben 12000 gar dahinden umbracht und erschlagen, Gott sige irer armen selen gnädig; sy verloren ouch vil fänlin und ettlich stuck buchsen, ouch das ganz gezüg des obristen hauptmans. Der flouch hinder sich in die statt Nanzig, alda er katig und mit blüt berunnen quartier sücht.



Die Frantzosen aber fiengend do an
 ihres kayzers müd werden und
 schruwend: furt, furt mit im! Und
 muß er die hauptmanschaft einem
 siner marschälk übergeben, doch
 tet er es nit gern, und ouch die frow
 kayserinne und ir bûb rusteten ir
 kisten und reiszüg und sachend
 umbe sich wo ire fründ wärend, die warend aber
 al nit ze finden, eintweders tot oder sunst versteckt,
 und ward do die wît der Frantzen uber ir nach-
 buren, denen sy doch ir land und herschaft rouben
 weltend, ungebürlich groß und jagtend und verjock-
 tend al uß dem land, arm und rich, alt und jung, und
 kamend do vil durch unser Eidgenoßßenland und ga-
 bend wir inen wes sy bedurfftend und ließend wir
 sy in ir heimat ziechen. Do war in sunderheit unser
 ersam botschaft ze Pareiß, ein frummer und lieber
 man, hieß Kern, der tet vil gûts an inen, er und sin
 eelich hußfrow, frow Alina, Gott muge inen vergelten
 was sy an den armen verjockten getan hand.

Das kriegsvolk aber der Franzosen welt in il gen
 Paris ziechen, uff daß es die hauptstatt des lands rettet,
 do bekamend sy aber underwegen die Tütschen und
 twungen sy zû offner feldschlacht und strittend sy
 drü tag und drü nächte umb den weg gen Paris, und
 sind domals, Gott sys geklagt, erschrockenlich vil lût
 getot und verwundt worden, und hüser und städel
 und dörffer verbrennt und verwüst, also daß jamer-
 lich was anzeschouwwen und muß zûletst das fran-
 zosisch her in die fest burg Metz genannit zûrugg, lit
 an dem fluß Mosella, vor alten ziten ein tütsche statt,
 darin ligt im münster der kayser Ludewig Karoli
 Magni sun begraben, und sichstu hie zûr siten das



wappen der loblichen statt abgebildet. Und ist die selbig statt mit polwerken, pastien, turmen und greben fast wol befestnet, also daß ire insaßen all iren trost und hoffnung daruff staltend, und warend nu me denn hundertusend kriegsknecht darin ingeschloßen sam in einer kefig, und ob sy schon mermalen versüchtend herußzegan, so warend die Tütschen mit so vil stuck und buchsen vor der statt und hattend so stark gräben und werinen gebuwen, daß aller versüch itel ward, und müstend sy warten, unz ir kayser oder ein andrer siner obristen käm und die statt entschuttet.



By disen tagen, was zû end mensis augusti, kamend unser knecht von der loblichen Eidgnoschaft von der grenzmark wider anheimsch, diewil der krieg wit von unserm land sich gespilt hat und man meint, es wurd bald fride sin, und jubiliertend unser brav und frumm mannen hoch über die heimfart, und ouch ire vätter, müeter und geswistere, etwan ouch ire brüt, warends zûfriden. Jedoch ließ man sy sich nit ganz abrusten, sunder furderlich bereit sin zû nuwern uffbruch.

Nach inschließung der statt und schloß Metz und do den fanen des kayzers ein nuw kriegsvolk zûgelouffen was und dasselbig gen Metz zûtrung, do macht ein teil des tütschen herzugs ein großen und witen bogen umb die vigendlich schlachtordnung herumb, und wie sich die vigend des nit versachend, siehe, so stündend sy uff ein mit einer unmaßen großen und

trefflichen schar inen gegenuber. Also kamend sy widerumb aneinander in einer großen feldschlacht, die geschach by statt und schloß Sedan, und verlurend die armen Frantzosen aber, und gabend die flucht in die stat, und ist on not zû erzellen wie sy daselb wie an allen andern orten kriegsvolk, panner, fänlin, stuck, buchsens, und ouch etwan ein stuck irer er verloren hand. Do was die statt zû lüzzel fur das vil volk und müst der kayser Napoleon am 2. tag septembris sich und den ganzen herzug den Tütschen ergeben; zeware, so ist das me dann der kunig Xerxes getan, der doch sin eigen land wider gewunnen, und schreib do der furnem herr ein brievlin an den Prußenkunig: ,min willig dienst sy üch allzit bereit, woledler, gnädiger und gunstiger herre kunig. Die-wil mir nit vergunt worden, tot zû sin — gott erbarms — so wil ich üch, woledler herr kunig, min rustung anheim geben und üwer gefangner sin. Sind Gott befolgen.' — Und also geschachs, der ganz herzug mit ußdermaßen vil plunder ward nach Tütschland in vanknus geführt, der kayser dorfft uff das, schloß Wilhelmshöchi in Hessenland ziechen, alda sin öheim, liederlichen angedenkens, vor ziten wonung gehept, und schickt im die kunigin iren eignen libkoch, der müst brodlen laßsen unß braten und bachen was der kayser welt, und kennt ich samer potz granaten manig arm pfäffelin, das gieng gern uff dasselbig schloß, wann der kuchimeister darby wär und sung darby in alter wise:

wo sol ich mich hinkeren,
ich tumpes brüderlin?
den keller wil ich leren,
darby gar frolich sin;
far wol du goldne kron,
mir gibt die kuniginne
iren koch zum crenlon.



öret nu witer. Do nu der kayser und
 sin her gefangen lagend, schru-
 wend die in der hauptstatt mit un-
 gestüme ie luter unde luter: furt mit
 im! er hat uns verraten, mit lugnery
 und trugnery, wir wend unser eigen
 herrn sin, do wir doch kein rech-
 ten kunig me habend, und luff do ein huff des wilden
 volks vor das rathus und zarten des kayser's ampt-
 lüt heruß und verjöckend sy in al vier wind, und do
 die kayserin und ir hûb das gschrey erhortend, ga-
 bend sy einem karner vil geld, daß er sy uff einem
 rollwagen uß der statt brächt, von dannen in ein
 schiff und witters in Engelland, alda sy noch sind.
 Gott erhalte sy unz an ir selig end. Die andern aber
 erkoren sich nuwe amptlüt, den Favre und den
 Thiers, ein alt graw männlin und gar witverrûmb-
 ten chronikschriber, und den Gambetta und den
 Rochefort ein calenderschriber und ander me, und
 richteten sich als ein fry land, das keinem kunig ge-
 horsamet und beschicktend al ir kriegsvolk in die
 hauptstat und buwten wunderbarlich schloßer und
 werinen und beschlußend die statt und rolltend vil
 tusend stuck feldschlangen und notschlangen uff die
 wäll und pastien und rumtend die statt uß von den
 husarmen lüten und den liederlichen juncfrouwen
 und erkoren ein obristen statthauptman, der hieß
 Trochu, ein gar tapfern und biderben man, und guß-
 ßen vil nuw stuck und bumben und kugelen und
 tatend swes sy bedurfftend, und do die Prußen vor
 die statt rucktend, do sachend sy daß die statt zû war,
 und ist ze ware ze vermelden, daß die groß statt Babel
 ein swere zit gar dapfer durchgefochten, und hat sy

zügknus abgelegt, das sy nit allein ein statt der laster, sunder ouch ein mütter maniger tugenden ist. Item so sond ir wißßen, daß die ersam botschaft der Eidgnossen ouch in der statt gebliben ist und aber vil gûts hat getan an tusend und aber tusend armen lüten.



o lond üch denn die groß statt belegeret sin und wendend üch herwiderumb zû unser grenzmark. Im Wasgau lit ein uralt statt, heißt Straßburg, deren bescheidenlich wappen sichstu hiê zursiten; die was vor ziten ein tûtsche richstatt, und erzelt der



chronist Königshofen gar vil und manigerley, wie sy groß geworden sige und krieg gehabt mit vil großen herren, bischofen, stätten und ländern, ouch mit dem apte ze San Gallen, und wie sy mit den Eidgnossen in ein punt trat und wie die buchsenschützen von Zürich mit einem warmen hirsbrei inen zûgezogen uff ir gesellenschießen, und ist kein statt im rich, alda die loblich poetry me geblügt denn ze Straßburg, wie ir denn uff allen tûtschen straßen und in den herbergen und sunst an allen orten gar manig lieplich lied von Straßburg hören mugend, und ist ouch ein gar alt profety bekant, und noch hût etwan geglaubt, daß ze Straßburg solt ein groß blütig schlacht geschlagen werden, darin der kunig von Frankrich sin end wurd finden. Aber sit 200 jaren was die statt nit me tûtsch, sunder die Frantzosen

hatten sy ingenommen und die Tütschen der statt nit darfur gehulffen, und was sy nun ein gar stárk festung worden mit muren und graben, und hieß ir obrister hauptman Uhrich. Do kam das tütsch kriegsvolk und belegert die statt und beschußend sy, und ward ir jamer und elend unsaglich, und geschach das alles, uff daß die statt den Tütschen güt fründ werden solt, und sind ire bícheryen kirchen und spitäler und rathüser all zerstort und kum sechenzig huser ganz bliben, und do der hunger und die not unertraglich wurd, beschicktend widerumb wie vor 400 und 300 jaren die Eidgenoßen ein ersam botschaft und batend den tütschen feldhauptman, daß er die armen wiber und kind herußließe, und gestattet ers inen, und haben wir, liebe kinder, sy by uns erhalten und ernert, und danken wir Gott, daß wir mit der belegerung nuntz anders zû tûn hattend denn erzeigung unser trûw und fründtschafft. Aber ietz wirt die statt tütsch und nit me frantzosisch oder eidgenoßisch. Gott erhalte sy in güten eren und trûwen.



Hs was aber der 27 tag septembris, do Straßburg sin tor offnote; am 4 tag octobris daruffolgende erschein in der statt Massilia ein man, des nam ist Hannibaldus, ein blütiger figend der pfaffen und fürsten, der het vor ziten in aller herren lender umb die fryheit gestritten, het dem heiligen vater zû Rom sin land abgewunnen und den kunig von Napoli uß der insul Sicilia vertriben, ouch in America etwan gar dapferlich sin swert brucht, lebt als bursman uff dem wenigen eiland Caprera, heißt in tütscher zungen Gitzin-

eiland, von dannen er den Franzosen zûzog, die sam-
 netend sich under sinem panner, und hater und ander
 franzosisch obristen in allen geginen sich gar treffen-
 lich gegen die Tûtschen gewêrt, aber nichts ußrichten
 mugen, wan die Tûtschen das kriegswerk baß ver-
 stündend. Jedoch so erhofftend sy anfengklich die
 statt Metz, hernach die statt Paris zû entsetzen; der
 prußisch adler hat aber sin klouwen so fest umb
 die statt geslagen daß kain herußkommen was. Do
 fiel am 27 tag octobris die statt Metz und ward be-
 satzt, wird ouch ein tûtsche stat, do si sit manig
 hundert jaren franzosisch gewesen, und do das isin
 band umb Paris ie enger und enger wurd, floch ein
 teil der obristen amptlût des lands in die statt Tours,
 und ist wol sam ein wunder anzeschouwen, daß der
 Gambetta in einer papiernen kugel, die ein schifflin
 trûg, hoch über die feldordnung der Tûtschen hin-
 weggefliegen und hand im die tûtschen kugele nuntz
 schaden kunnen. Und do die Tûtschen ouch die statt
 Tours erobert, zog das regiment gen Bordeaux, und
 koufft man waffen und bulver und stuck und buch-
 sen von den Engellender und in America und meint,
 es müst sin daß man die figend wider uß dem land
 verjôckt, iedoch sy blibend darinnen, und bracht tag
 umb tag nuwen sig und nuwes land und den elen-
 den Franzosen nuwen jamer, und ward do die frôud
 der Tûtschen gar groß und weltend sy nit me zû-
 friden sin mit einem oder etlichen kunigen, sunder
 ouch ein kayser haben, und machtend sy den Pruß-
 ßenkunig zum tûtschen kayser und ist Tûtschland
 ietzt ein kaysertum, sam es zû den ziten kayser Bar-
 barossæ gwesen, meinend ouch die gelerten, daß die
 raben so umb den kyffhouser geflogen, ietzt furt und
 daruß gezogen; so kan ich ûch nit berichten, ob daß
 mit der warhait gegloubt werden muge, und vermein
 ich doch etlich raben iemer noch ze sehenne; wâr
 sunst gût, wan das swarz gefugele uß tûtschem land
 vertriben wâr.

Zu denselben tagen fiengend die vor Paris an steg, weg und brucken ze machen mit großen hölzern und fulltend die greben uß, damit sy ir grusam gschutz, chartunen und notschlangen fur die statt möchten bringen sy zu nöttigen. Uff den 27 tag decembris hat der Pruß zum ersten angefangen schießen und die statt mit großen hauptstucken genöttiget, die flugend witer den eine ganze mil wegs. Ditz hat mit unußsprechenlichen schaden geweret biß uff den 28 tag januarii, und ob die Pariser schon tusend und aber tusend stuck viech, korn, ruchfleisch und allerley was zu uffenthaltung des libs gehort, zusamengehuffet hattend, so was es doch uff die wil allzu wenig, und möchtend mittler zit die proviantmeister die gemein in der stat nit mer mit spiß versechen; doch erhüb sich kein ufflouff, do doch der hunger und mangel also überhand gewinnen, daß sich vil ernertend mit kruter und wurtzen, darnach sind katzen, müß, hund und derglichen tier wildbret gewesen; war erbermlich zu sechen, wie vil durch langwirigen hunger abgedüret, sy möchtend den lib nit me wol tragen, Gott erbarmt.



Lieben kinder, do was allein noch ein enig her der Frantzosen überig, das solt die fest burg Belfort entsatzen, und was der oberst hauptman desselbigen hers Bourbaki, ouch ein dapferer soldat, der sturmt die polwerk des prüßischen legers vor Belfort drü tag lang und vertreib die figend nit daruß, wan sin kriegsvolk durch überschwenglich sorg, mangel und abgang krank und uffgezeit von hunger und siechtum was. Do ward zu end des kriegs der ganz frantzosisch herzug

von allen siten ingeschlossen, und namend sy do die Eidgnosßen uff in ir land, und sond ir wüßßen zñ ewigem gedächtnus, daß im 1871 jar me den achtzig-tusend Frantzosen unser gäst gewesen sind, und habend wir sy gepflegt, uffenthalten in kirchen, schülen, rathüßern, städeln und andern orten, sam sy uns eigen gehortend, ouch sy versechen mit geschüch, plunder und allerlai libs notturfft, ettlich ouch by uns begraben, Gott verliche inen ein froliche urstend. Die hand wir behalten unz der fride gemacht was, und hat maniger under inen unser land sam sin eigen heimat lieb gewonnen.

Am 13 tag mensis martij kam gen Sangallen die botschaft, daß der krieg üß und gericht sige. Gott well uns den frid erhalten ie und immerdar.



RID, bis wilkum, krieg, güte nacht,
hast uns vil not und unrüw bracht.
manch herz, fur Gott und menschen
warm,
lit nu dem kalten tod im arm.
Und sind der trähenen so vil gßlossen,
hetten sy in einen bach sich goßßen,

ein großer strom wär worden druß,
hätt salz genög im überfluß.
stätt dörffer hüser sind verbrennt,
in unglück ist das glück gewendt.
die äcker ligend wüest und brach,
gemach ist worden ungemach.

mensch, was du tist, bedenk das end,
 so wird all sach zum besten gwendt.
 hettend den spruch bedacht die Frantzen,
 sy müeßend nach tütscher pfiff nit tantzen.
 nu ist der Tütschen gwalt und macht
 uß tiefem slaf hell uffgewacht,
 hand ire spän und zänk uffgeben,
 wend furhin mit einander leben,
 sind worden all ein enig gmein,
 richtend ir sachen all in ein,
 habend von nuw einen kayser gwunnen




und bschouwend sich in siner sunnen.
 tütsch volk, bedenk ouch du das end,
 das wird die höchste wysheit gnent.
 stuck buchsen harnasch und gewer
 gehören wol zû kunigs er,
 doch haß noch im die fryheit frumt
 so von dem himel selber kumt.
 fry hat den menschen gschaffen got,
 nit zû der ritter und psaffen spot.
 al weltlich macht und rich zergat,
 fryheit allein on end bestat.

der romer rich was ganz zergangen,
 do dfryheit ward in turn gefangen.
 fryheit ist mannes höchster orden,
 we dem der will die fryheit morden.
 o bouwt der fryheit nur ein hus,
 leb leser wol, min lied ist uß.

hie hat ein end ditze nuwe und warhaffte chronik
 vom tütschen krieg, ist getruckt in der loblichen
 statt Sangallen durch Emiliun Zollikoferu,
 bächtrucker, datum anno von Christi
 menschwerdung mdccclxxi, von regie-
 rung des miltosten kaisers Wilhelmi
 merer des richs am ersten, ge-
 schriben Sangallen in dem
 namen gotz heilsamklich
 amen.

Bayerische
 Staatsbibliothek
 München







INGER
HERE
N



INGER
HERE
N



FINGER
HERE!
N



INGER
EREI
N



INGER
EREI
N

